

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 33. sjednici Predstavničkog doma, održanoj 29. jula 2008. godine, i na 20. sjednici Doma naroda, održanoj 30. jula 2008. godine, usvojila je

ZAKON

O IZMJENAMA I DOPUNAMA ZAKONA O JEDINSTVENOM MATIČNOM BROJU

Član 1.

U Zakonu o jedinstvenom matičnom broju ("Službeni glasnik BiH", br. 32/01) član 1. stav 1. mijenja se i glasi:

"Ovim zakonom propisuje se određivanje, dodjeljivanje, upisivanje, korištenje, evidencija, struktura, poništenje i zamjena jedinstvenog matičnog broja (u daljnjem tekstu: JMB) državljana Bosne i Hercegovine i stranih državljana u Bosni i Hercegovini."

Član 2.

U članu 3. stav 1. mijenja se i glasi:

"Određivanje, poništavanje i zamjenu JMB u okviru svoje nadležnosti vrše u Federaciji BiH kantonalna ministarstva unutrašnjih poslova, u Republici Srpskoj Ministarstvo unutrašnjih poslova RS-a i u Brčko Distriktu BiH nadležni organ koji funkcionalno djeluje kao državna institucija (u daljnjem tekstu: nadležni organ)."

U stavu 2. riječ "izdaju" zamjenjuje se riječju "određuju".

Stav 3. mijenja se i glasi:

"Nadležni organ rješava kao drugostepeni organ u žalbenom postupku na odluke tog organa koji je rješavao u prvom stepenu za određivanje, poništavanje i zamjenu JMB."

Član 3.

U članu 10. stavu 3. riječ "kopiju" briše se.

U stavu 5. riječi: "putem kanala opisanih" zamjenjuju se riječima: "na način opisan".

Iza stava 5. dodaje se novi stav 6. koji glasi:

"Podnošenje zahtjeva i izvještavanje podnosioca zahtjeva o dodijeljenom JMB iz stava 3., 4. i 5. ovog člana može se obaviti elektronskim putem između DKP-a BiH i nadležnog organa. Podnosilac zahtjeva za dodjeljivanje JMB elektronskim putem dužan je, prilikom podnošenja zahtjeva, priložiti izvod iz matične knjige rođenih i dokaz o državljanstvu BiH koji se dostavlja nadležnom organu u BiH."

Član 4.

U članu 11. riječi: ("Službeni glasnik BiH", br. 13/99)" brišu se, a riječi: "prebivališta u BiH" zamjenjuju se riječima: "odobrenog boravka u BiH".

Član 5.

član 12. mijenja se i glasi:

"Član 12.

Lice koje stiče državljanstvo BiH na osnovu člana 11. ovog zakona i kojem je dodijeljen JMB u jednoj od bivših republika SFRJ odredit će se jedinstveni matični broj BiH."

Član 6.

Član 14. briše se.

Član 7.

U članu 16. stav 1. mijenja se i glasi:

"Državljaninu BiH dodjeljuje se samo jedan JMB. Isti JMB može se dodijeliti samo jednom licu."

Član 8.

U članu 25. stav 2. riječi: "Zakona o imigraciji i azilu Bosne i Hercegovine ("Službeni glasnik BiH", br. 23/99)" zamjenjuju se riječima: "propisa kojim je reguliran boravak stranaca u BiH".

Član 9.

U članu 28. stav 3. mijenja se i glasi:

"Ako dva ili više lica imaju isti JMB, nadležni organ odnosno organi poništavaju sve JMB osim prvog evidentiranog JMB u centralnoj evidenciji. Nadležni organ odnosno organi naknadno dodjeljuju novi JMB kojim se zamjenjuje poništeni JMB."

Član 10.

U članu 29. stav 1. mijenja se i glasi:

"Organ koji donosi rješenje o ispravci upisanog dana, mjeseca i godine rođenja kao i organ koji donosi rješenje o upisu promjene spola i potpunog usvojenja dužan je u roku od 30 dana od pravosnažnosti rješenja dostaviti jedan primjerak rješenja nadležnom organu."

U stavu 2. riječi: "stupa u kontakt s licem" zamjenjuju se riječima: "obavještava lice".

Stav 3. briše se.

Član 11.

U članu 41. stav 1., članu 46. stav 2. i članu 47. stav 1. riječ "kopiju" briše se.

Član 12.

U članu 48. stav 3. riječi: "putem kanala opisanih" zamjenjuju se riječima: "na način opisan".

Član 13.

U članu 53. riječi: "od 10 KM do 100 KM" zamjenjuju se riječima: "od 30 KM do 300 KM".

Član 14.

U cijelom tekstu Zakona riječi: "Ministarstvo civilnih poslova i komunikacija BiH - MCPK" zamjenjuju se riječima: "Ministarstvo civilnih poslova BiH - MCP", u odgovarajućem padežu.

Član 15.

Ovaj zakon stupa na snagu osmog dana od dana objavljivanja u "Službenom glasniku BiH", a bit će objavljen u službenim glasilima entiteta i Brčko Distrikta BiH.

PSBiH broj 240/08
30. jula 2008. godine
Sarajevo

Predsjedavajući
Predstavničkog doma
Parlamentarne skupštine BiH
Niko Lozančić, s. r.

Predsjedavajući
Doma naroda
Parlamentarne skupštine BiH
dr. **Mladen Ivanić**, s. r.